

Apirilaren 18an  
**3. PAZKO IGANDEA**

**Agurra**

Heriotzaren lokarriak etenik Jesu Kristo berpiztu duen Jainko bizi-emailea izan bedi zuekin.

**Sarrerako oharpena**

Kristo Piztua gure artean dago egiaz. Ezagutu dezagun batzarraren erdian; entzungo dugun Hitz ederrean; elkarbanatuko dugun Ogi bizian. Eta eraman dezagun gero gurekin, goazen toki guztietan Kristoren bizia izan dadinugar eta bultzagarri.

**Bataio-urez zirtatzea**

**Senide maiteok, egin diezaiozun otoitz Jainko geure Jaunari, Pazko gau santuan bedeinkatu genuen ura Bataioaren oroipenez geure burua zirtatzeko erabiltzera goazen honetan. Ur honek berrizta gaitzala, hartu dugun Espirituari beti leial izan gakizkion.**

*Ura bedeinkatu nahi bada, ikusi otoitza Meza-liburuko 1286. orrian.*

*Kantu egoki bat kantatuz, herria zirtatuko du apaizak.*

**Jainko ahalguztidunak garbi gaitzala bekatutik eta, Eukaristia honen bidez, bere erreinuko mahaian jartzeko gai egin gaitzala. Amen.**

**Erruki, Jauna.** Erruki, Jauna.

**Kristo, erruki.** Kristo, erruki.

**Erruki, Jauna.** Erruki, Jauna.

**Aintza zeruetan**

Kanta dezagun aintzazko gorazarrea, gure alde otoitz egiteko Aitaren eskuin aldean dagoen Jesu Kristo Jaunari dei eginez.

## Otoitza

**Oi Jainko, poztu dadila beti  
biziberritu eta gaztetu duzun zure herria;  
egizu, zure seme-alaba ordeko izatea  
berreskuratu izanaz pozturik,  
usterik sendoenaz itxaro dezagula piztuera-eguna.  
Zure Seme Jesu Kristo gure Jaunaren bitartez,  
Zurekin eta Espiritu Santuarekin batean  
Jainko eta errege bizi baita gizaldi eta gizaldietan.**

## Hitzaren liturgiari oharpena

Apostoluen inguruan sortutako elkartearen testigantza, aberasgarri dugu gaur senide elkartasunean bizitzeko. Jesus fedez onartzeak, egiazko bizia ematen digu.

## Lehenengo irakurgaia (Eg 3, 13-15. 17-19)

Apostoluen Eginak liburutik

Egun haietan, Pedrok honela hitz egin zion herriari: «Abrahamen, Isaaken eta Jakoberen Jainkoak, gure arbasoen Jainkoak, aintzaz bete du Jesus bere zerbitzaria, zuek agintariei eskura eman eta Pilatoren aurrean ukatu zenuten hura, honek askatzea erabaki zuen arren. Santua eta Zuzena ukatu zenuten, eta hiltzailea askatzeko eskatu; biziaren sorburua hil zenuten, baina Jainkoak piztu egin du hilen artetik; geu gara horren testigu.

Badakit, senideok, ezjakinean jokatu zenutela zuek, baita zuen agintariak ere. Baina horrela bete zuen Jainkoak, profeta guztien ahoz aurrez iragarria, hots, haren Mesiasak sufritu egin behar zuela. Bihotz-berri zaitezte, beraz, eta itzuli Jainkoagana, bekatuak ken dakizkizuen».

**Erantzun-salmoa** (*Sal 4, 2. 7. 9*)

Jau-na-ri kan - ta, o-na bai - ta, hain du haun-di-  
a be - re be - ti - ko e-rru - ki - a.

- ∞. Deitzen dizudanean, erantzun, Jainko, ene defendatzaile.  
Estualdian emadazu lasaitasun.  
Erruki zakizkit eta entzun nire otoitza. ∞.
- ∞. Jakizue maitasun harrigarria agertzen didala Jaunak,  
entzun egiten didala deitzen diodanean. ∞.
- ∞. Asko ari dira esaten: «Nork emango guri zorriona?»  
Aldendu egin duzu gugandik, Jauna,  
zeure aurpegi argitsua! ∞.
- ∞. Bakean oheratzen naiz eta berehala lokartzen,  
Zuk bakarrik bainauzu, Jauna, lasai biziarazten. ∞.

**Bigarren irakurgaia** (*1 Jn 2, 1-5*)

San Joan Apostoluaren lehenengo gutunetik

Ene seme-alabok, bekaturik egin ez dezazuen idazten dizuet hau. Hala ere, norbaitek bekatu egiten badu, badugu laguntzailea Aitaren aurrean: zuzena den Jesu Kristo. Hark bere burua eskaini zuen gure bekatuen barkamenerako; eta gureen barkamenerako ez ezik, baita mundu guztikoen barkamenerako ere.

Jainkoa ezagutzen dugula honetatik dakigu: haren aginduak betetzetik. «Nik ezagutzen dut Jainkoa» esan eta haren aginduak

betetzen ez dituen geurtia da, eta horrelakoagan ez dago egia. Haren hitza betetzen duenagan, berriz, Jainkoaren maitasuna bere betera iritsi da egiaz.

### Aleluia (Ik. Lk 24, 32)



✠. Jesus Jauna, ager guri Liburu Santuak;  
sutu gure bihotzak hitz egiten diguzunean. ✠.

### Ebanjelioa (Lk 24, 35-48)

#### Homiliarako argibideak

##### *Adimena ireki zien*

Zenbait eleberri irakurtzea edo pelikula ikustea zail gertatzen da, pertsonaiak ulertzeko behar adina datu ematen ez dizkigunean. Jesusen ikasleei ere ulergaitza gertatu zitzaizen maisuaren historia. Haren heriotzak eta piztuerak **zur eta lur** utzi zituen. Piztua ikusi zutenean ez ziren ezagutzeko gai. Mamuren bat zela ere pentsatu zuten. Irudi berria zuen Jesusek piztu ondoren.

Irakurtzen zituzten Liburu Santuek, hasieran behintzat ez zien lagundu. Ez dugu harritu behar, gu ere ulertu ezinik gertatzen garenean. Historia asko dago Biblian. Jesus da, ordea, adimena ireki ziena, Eskritura Santua ulertzen laguntzen diguna. Jesus Liburu Santua **ulertzeko giltza**. Jesusek argitzen gaitu, Liburu Santu osoaren helmuga bere piztuera dela ulertzeko. Biblia ezin da Jesus gabe ulertu; ezta Jesus ere Bibliarik gabe.

Apostoluak jokoz kanpo bezala gertatu ziren. Espirituaren argitan, ordea, dena garbiagoa zen. Jainkoaren egitasmoak bazuen zentzua. Hainbat pertsonaiaren egitekoa ere ulergarriago gertatzen zen historia honetan. Jainkoa, izan ere, gai da **lerro okerretan ere zuzen idazteko**. Jesus piztuagan adiskidetu du Jainkoak mundua eta denok deitzen gaitu bihotz berria izatera. Ez dago zalantzarik. Ez dago beldurrik. Ez dago mamurik. Jaun piztua gure artean da, bizirik.

Elkartean bilduak zeudela argitu zien Jesusek adimena Liburu Santua ulertzeko. **Elkartearen baitan** ulertzen dugu Jainkoaren Hitza, ez bakoitzak bere kontura. Elkarterik gabe galdu egiten gara. Elkartean jaso dugu Hitza, elkartean topo egin dugu Jesus Piztuarekin, elkartetik eta elkartearekin goaz Berri Ona iragartzera. Pertsonala da Jesusekin topo egitea, noski! Baina Eliz elkartean gertatzen da.

Ikasleentzat ez zen nahikoa izan Jesusek aurrez piztuera aipatzea. Beharrezkoa izan zen Jaun Piztua presente sumatzea. Jesusekin izandako **otorduak**, oso argigarri izan zitzaizkien. Hitzek eta egintzek bat egiten dutenean ezagutu daiteke Jesus Piztua. Elkarrekin jaten dugunean konturatzen gara Jesus gurekin dela.

Jesusek ez zien adimena ireki testu batzuk ulertzeko, **Bere bizitza uler zezaten** baizik. Bere aginduak betetzen dituenak bakarrik ezagutu dezake egiaz. Ogia elkarrekin zatitzeak lagun diezagula gure etorkizunari bidea zabaltzen dion Jesus Piztua ezagutzen.

### Jainkoaren herriaren otoitza

Dei egiogun, senide maiteok, beti gure alde otoitzean ari den Kristori, bekatuaren eta heriotzaren garaileari:

*Erantzuna:* **Entzun Zuk, Kristo, herri honen oihua!**



En - tzun, Zuk Kris - to, he - rri ho - nen oi - hu - a.

- Kristok, Jaunak, fededunen bihotzak beregana ditzan eta haien gogoak sendotu, zeruko ondasunak bila ditzaten, han baitago Bera Aitaren eskuinaldean. Egigun otoitz.
- Kristok, kreazioaren nagusiak, herri guztiei bere agerraldietan ikasleei eman zien bake bera eman diezaien. Egigun otoitz.
- Kristok, heriotza desegin duenak eta gaixotasun ororen sendagile denak, ahulez eta zorigaitzekoez erruki izan dezan eta mundutik gosea, gerra eta gaitz oro urruntzen lagun diezagun. Egigun otoitz.
- Kristok, Jaunak, gure elkarte bedeinka dezan eta Bere garaipena ospatzera gaur bildu garenoi bakea, alaitasuna eta atsedena eman diezagun. Egigun otoitz.

Jainko Jauna, gure bekatuengatik eskainia izan zen Zure Semearen garaipenean jarri duzu adiskidetzearen eta bakearen oinarria; entzun Zure Elizaren otoitzak, eta egin gaitzazu Zure maitasunean baketutako gizadi berriaren ezaugarri eta legami. Zure Seme Jesu Kristoren bitartez, errege bizi baita, hilezkor eta aintzatsu, gizaldi eta gizaldietan.

### **Eukaristiaren liturgiari oharpena**

Mezako otoitz nagusira goaz: esker ona eta gorapena dario. Kristo berak Ogia zatituko du guretzat. Kristo bera emango zaigu janari.

### **Jaunartze-ondorengo otoitza**

**Begira bihotz onez, Jauna, zeure herriari  
eta, betiereko biziaren sakramentuetan eraberritu duzunez,  
egizu, irits dadila  
aintzaz beteko den haragiaren piztuera hilezkorra.  
Jesu Kristo gure Jaunaren bitartez.**

**Bedeinkapen nagusia**

**Jauna zuekin.** Eta zure espirituarekin.

**Makur zaitezte, Jaunaren bedeinkapena hartzeko.**

*(Eskuak herriaren gain zabalik bedeinkapena esango du:)*

**Bere Semearen piztueraz salbatu  
eta bere seme-alaba egin zaituzten Jainkoak  
poztu zaitzatela bere bedeinkapenaz.** Amen.

**Bere erospenaz egiazko askatasuna lortu dizuen Kristok  
eman diezazuela betiko oinordekotza.** Amen.

**Zuen sinesmena aitortuz,  
Bataioan Kristorekin piztu zaretenok,  
orain zintzo bizi izanez,  
lor dezazuela zeruan Harekin bat egitea.** Amen.

**Bedeinka zaitzatela Jainko ahalguztidunak:  
Aitak, eta Semeak, ✠ eta Espiritu Santuak.** Amen.

**Zoazte Jaunaren bakean, aleluia, aleluia!  
Eskerrak Jainkoari, aleluia, aleluia!**